

U prostorijama Općine Odžak, danas 06.11.2014. godine, održan je informativni sastanak s predstavnicima političkih stranaka. Tema sastanka bio je Nacrt proračuna Općine Odžak za 2015. godinu.

Iako je svim predstavnicima političkih stranaka bio upućen poziv na sastanak, te dostavljen materijal pripremljen od strane Službe za financiranje Općine Odžak, sastanku se odazvao veoma mali broj predstavnika političkih stranaka. Pored predstavnika SDA i HDZ-a BiH, sastanku su prisustvovali načelnik Općine Odžak dr.sc. Hajrudin Hadžidedić, te načelnica Službe za nabavku i zaštitu sredstava i resursa Nihada Bećirbašić.

Nakon pozdrava i kratkog uvoda općinskog načelnika, načelnica Bećirbašić obrazložila je Nacrt proračuna Općine Odžak za 2015.godinu.

U skladu s člankom 32 Zakona o proračunima u Federaciji Bosne i Hercegovine ("Službene novine FBiH br.103/13, 9/14 i 13/14) urađen je prijedlog Nacrta proračuna za 2015. godinu. Nacrt je dostavljen Općinskom vijeću, te Ministarstvu financija Županije Posavske kako bi dali svoje mišljenje na predloženi dokument.

Dosadašnja praksa, te određena neslaganja prilikom usvajanja proračuna dovela su službu i načelnika u poziciju da se na ovaj materijal na vrijeme očituju i predstavnici političkih stranaka koje participiraju putem svojih vijećnika u radu Općinskog vijeća.

Kao i svake godine, ni fiskalna 2015. godina neće biti ništa drugačija s obzirom na činjenicu da su realni rashodi u planu veći od realnih prihoda. Nakon što su posloženi zahtjevi za proračunskim sredstvima, došlo se do situacije da su ukupni rashodi i izdaci 4.425.959, 00 KM, a s druge strane realni prihodi i primici 4.016.970,00 KM. Dakle, manjak prihoda i primitaka je oko 410.000,00 KM. Jedino ispravno bi bilo u Nacrtu proračuna smanjiti rashode za tih 410.000,00 KM, kako bi proračun bio realan i ostvariv. Kao i svake godine, smanjenja bi se po zakonu mogla odraditi na ukupnim izdacima za tekuće transfere, koja čine 25-30% proračunskih prihoda i primitaka. No, novčana sredstva predviđena za sport, radio postaje, Centar za kulturu, udruge proistekle iz Domovinskog rata, transferi vjerskim zajednicama, DVD, Centar socijalne skrbi, Crveni križ, prijevoz školske djece itd. su ionako maleni da nisu dovoljni za normalno funkcioniranje nabrojanih korisnika transfera. Iz tog razloga su usklađeni prihodi u Nacrtu, gdje su podignute vrijednosti prihoda na pozicijama u odnosu na očekivane:

- porez na dohodak 20.000,00 KM,
- PDV za 100.000,00 KM,
- općinske administrativne takse za 105.000,00 KM,
- naknada za uređenje građevinskog zemljišta za 20. 000,00 KM,
- kapitalni primici od ostalih razina vlasti za 65. 000,00 KM,
- kapitalni primici od kantona za 100. 000,00 KM.

Ova sredstva nisu ni realna ni izvjesna, pa bi bilo korektnije da Općinsko vijeće, nakon što je svojim odlukama smanjilo realne prihode, razmisli o vraćanju odluke o komunalnim pristojbama (taksa na tvrtku) i pod hitno usvoji odluku o komunalnoj naknadi, čime bi se stvorile pretpostavke za normalnije funkcioniranje organa uprave. Rashodi i izdaci su planirani u iznosu od 4.425.959,00 KM ili za 12% manje u odnosu na usvojeni proračun za 2014. godinu.

Kakva će biti realizacija troškova predviđenih nacrtom proračuna u 2015. godini ovisit će u velikoj mjeri od predviđene pomoći proračunu Općine Odžak od strane Županijskog proračuna planiranom u iznosu 300.000,00 KM. Ako Vlada Županije Posavske do kraja 2014. godine transferira Općini Odžak ova sredstva predviđena u nedavno usvojenom rebalansu od strane Skupštine Županije Posavske, funkcioniranje Općine ne bi smjelo doći u pitanje kod izmirenja planiranih rashoda. No, ako se desi da ova godina bude završena u deficitu, prvo što slijedi u 2015.g. jeste pokriće deficita. Iz tog razloga mora doći do smanjenja ukupnih izdataka za tekuće transfere. Kome i koliko, o tome će odlučiti općinski vijećnici.

Jasan je pad poreznih prihoda, pogotovo prihoda neizravnih poreza koji pripadaju općinama. iz tog razloga se očekuje od Općinskog vijeća da stvori zakonsku podlogu za povećanje neporeznih prihoda, tj.prihoda koje ubire i za koje je odgovoran organ uprave.